

摘藻堂四庫全書薈要

集部

欽定四庫全書薈要卷一萬八千三百十三

集部

御選宋詩卷六

樂府歌行三

張耒

襄陽曲

西津折葦鳴策策蟾蜍光入芙蓉白山頭不雨賈船稀  
日日門前江水窄欲將烜赫招行人旋起丹樓照長陌  
銀屏深蔽玉笙開自擘新橙飲北客倏離暫合心未果

淚映雙眸爲誰墮

寄衣曲

秋風西來入庭樹攀條正念征人苦空牕自織不敢住  
鳴機愁寂如鳴櫓練成欲裁新絲香抱持含愁上姑堂  
別來不見衣覺窄試比小郎身更長

怨曲

祖席駐征橈開帆復信潮隔筵桃葉泣吹管杏花飄船  
去鷗飛閣人歸鹿上橋別離惆悵淚江鷺宿紅蕉

壽陽歌

壽陽樓前淮水碧壽陽美女如脂白李郎青鬢照青衫  
曾在花前作狂客伯勞睡重花枝晚時許蜻蜓一偷眼  
歡娛雖少恨已多纖手紅牋揮翠管淮陽歸來春已暮  
夜夜夢魂淮上去欲歌舊曲只添愁畫得雙蛾不能語  
有客南來從壽春衆中笑問動精神自從柳別章臺後  
攀折風光知幾人已伴春衫辭側帽不怕嬌啼隨意笑  
嗟君耿耿獨相思須信多情是年少

牧牛兒

牧牛兒遠陂牧遠陂牧牛芳草綠兒怒掉鞭牛不觸澗  
邊柳古南風清麥深蔽目田野平烏犍礪角逐草行老  
犢卧噍饑不鳴犢兒跳梁沒草去隔林應母時一聲老  
翁念兒自攜餉出門先上岡頭望日斜風雨濕蓑衣拍  
手唱歌尋伴歸遠村放牧風日薄近村牧牛泥水惡珠  
璣燕趙兒不知兒生但知牛背樂

採蓮子

菡萏香蓮十頃陂  
小姑貪戲採蓮池  
晚來弄水船頭濕  
更脫新裙裹鴨兒

獨處愁

高高花飛驚秋顏  
珠簾鎖樓春風閒  
少年金鞍照秦地  
玉卮雙覆塵埃間  
花間蝴蝶雙飛舞  
感觸深心心更苦  
昨夜陰雲數尺許  
連宵變作西窗雨

遠別離

遠別離明當入蜀去  
酒酣日落客心驚  
起與僕夫先議

路引車在庭牛在槽  
桐枝嫋嫋秋風豪  
別情悵惘氣不下  
酒觴翻污麒麟袍  
緩清歌慰幽獨  
不惜更長更燒燭  
贈君髮上古搔頭  
莫易此心如此玉  
平生每笑花飛片  
東家吹落西家怨  
但得歸時似別時  
相知何必長相見  
白紵詞效鮑昭

搖輕裾曳長袖為楚舞  
千萬壽新詞白紵聲  
按舊朔風捲地來  
崢嶸燕雁避霜饑  
不鳴高堂酒多華  
燭明

回纖腰出素手  
髻墮鬢傾釵欲溜  
為君歌舞君飲酒  
歲

云暮矣七澤空湯湯漢沔天北風玉壺之酒樂未終

啄木辭

紅錦長條當背垂紫檀槽穩橫朱絲美人亭亭面如雪  
纖手當筵金捍撥彈成丁丁啄木聲春林蔽日春晝晴  
徘徊深枝穿翠葉玉啄勞時還暫歇深園斷嶺人不知  
中有槎枒風雨枝蠹多蟲老飽可樂山靜花深終日啄  
雄雌相求飛且鳴高枝礪背板有聲無功忍使饑腸飽  
有意却教枯樹青疾彈如歌細如語曲欲終時情更駐



一聲穿樹忽驚飛  
葉動枝搖不知處

江南曲

平湖碧玉煙波濶  
菱荷風起秋香發  
採蓮女兒紅粉新  
烟中笑語隔烟聞  
高繫紅裙袖雙捲  
不惜浮萍沾皓腕  
爭先採得隱船蓬  
多少相欺互相問  
吳兒蕩槳來何事  
手指荷花示深意  
郎指蓮房妾折絲  
蓮不到頭絲不止  
月上湖平四散歸  
舟輕楫短去如飛  
斷腸脉脉兩無語  
寄情流水傳相思

陳師道

放歌行二首

春風永巷閉娉婷  
長使青樓誤得名  
不惜捲簾通一顧  
怕君著眼未分明

當年不嫁惜娉婷  
抹白施朱作後生  
說與傍人須早計  
隨宜梳洗莫傾城

李之儀

四時詞擬徐陵用今體次東坡舊韻

春

紅綠枝頭自開落薄日低雲天一幕可堪困緒尚眠蠶  
未擬賞心催破夢寶環半脫畏侵肌百刻縈香竟屬誰  
旋製稱身官樣窄慵看架上去年衣

夏

蜀葵易過紅榴永鱗鱗瑩角波紋冷水光暗透玉枕涼  
扇影風搖深院靜無言一向幾回顰品盡么絃竟不勻  
空被梁間偷眼燕黃蜂元是竊香人

秋

畫圖展盡瀟湘綠窈窕新詞寫啼竹薄衾笈拂又經年  
已報莎雞入重屋漸施簾幙作深局時看明河步廣庭  
旋索羅衣防露下隔牆聞叫侍兒聲

冬

休願車輪生四角莫向金樽嫌酒薄門外風號雁陣低  
擁衾同看殘燈落輓轡敲凍驚棲鴉睡紅笈引臘脂霞  
未擬雕籠問鸚鵡先投宿酒敵霜花

蘓庠

清江曲

屬玉雙飛水滿塘  
菰蒲深處浴鴛鴦  
白蘋滿棹歸來晚  
秋著蘆花一岸霜  
扁舟繫岸依林樾  
蕭蕭兩鬢吹華髮  
萬事不理醉復醒  
長占烟波弄明月

司馬頰

洛春謠

洛陽碧水揚春風  
銅駝陌上桃花紅  
高樓疊柳綠相向

綃帳金鸞香霧濃  
襲裘公子五陵客  
拳毛赤兔雙蹄白  
金鈎寶玦逐飛香  
醉入花叢惱花魄  
青娥皓齒列吳侶  
梅粉粧成半額黃  
羅屏繡幕圍寒玉  
帳裏吹簫學鳳皇  
細綠圍紅曉烟濕  
車馬駢駢雲櫛櫛  
瓊蘂杯深琥珀濃  
鴛鴦枕鏤珊瑚澀  
吹龍笛歌白紵  
蘭席淋漓日將暮  
君不見灞陵岸上  
楊柳枝青青  
送別傷南浦

田畫

築長堤

築長堤白頭荷杵隨者妻背骨偃僂筋力微以手置胸  
路旁啼老夫七十嫗與齊五尺應門生兩兒夜來春雨  
深一犁破曉徑去耕南陂南隣里正豪且強白紙大字  
來呼追科頭跣足不得稽要與官長修長堤官長亦大  
賢能得使者意正堤駕輶軒不復問餘事終當升諸朝  
自足富妻子何惜桑榆年一為官長死

唐庚

陌上桑曲

蕭疎陌上桑寂寞採桑女蠶老葉轉稀羅敷淚如雨斂  
袂感雙蛾秦第一曲歌慙勤謝郎意其如義命何

### 憶昔行

憶昔方東來亭傳荒荆棘風庭紅葉乾雨砌蒼苔濕饑  
虎撥門開哀禽向人泣十載却西還亭傳已完茸青鎖  
揖江山朱欄起堦級行旅糧不賫大路遺敢拾蜀道無  
難易人心自寬急寄言守亭者勿使狐狸入

### 結客少年場



結客何用少年場男兒尚氣須激昂朝從魯朱家暮過  
秦武陽飲酒邯鄲市膝上橫秋霜明年從軍入燉煌金  
印紫綬輝路傍貧中知己慎勿忘

龔況

古樂府

妖嬈破瓜女爭上鞦韆架香飄石榴裙影落薔薇下墻  
外見鴛鴦雙雙春水塘歸來情脉脉無緒理殘粧

曹組

夜歸曲

饑鳥啞啞啼暮寒回風急雪飄朱闌瑣窗繡閣豔紅獸  
書幕金泥搖彩鸞吳粧秀色攢眉綠能唱襄陽大堤曲  
酒酣橫笛咽孤吹吹裂柯亭傲霜竹遠空寒雪渾不動  
老狐應被黃河凍暗回微暖入江梅何處荒榛挂么鳳  
歸來穩跨青連錢貂耳擁鼻行翩翩籠紗密炬照飛霞  
十二玉樓人未眠

歐陽澈

夢仙謠

寥陽洞口風烟好枯木槎枒挿雲島重重金瑣遶嬋娟  
滿地落花常不埽蕭郎聞說已乘鸞空餘九轉燒丹竈  
烟霞截斷絕非塵凡夫蹤跡無由到高陽有客携佳侶  
訪異尋幽豁襟抱瓊樓飲散恣歡遊誤入蓬壺如夢覺  
雲闕初叩聞無人松梢鶴唳如驚報須臾彥戶迎者誰  
吳宮女兒面凝脂指點蘭堂篆烟裊珠箔玲瓏宰地垂  
高擎翠袖輕輕捲半露妖嬈素蓮臉嫣然一笑啟檀唇

喚我躋堂語聲軟相隨環坐一軒秋旋列杯盤供雅宴  
倚風仙藥似有情競吐芳苞噴香遠朝雲一段下陽臺  
綽約標容塵世鮮黛眉輕拂遠山青明眸斜盼秋波剪  
蘭柔柳弱不禁風睡起芙蓉香體顫櫻桃緩啟歌貫珠  
夕陽花外流鶯轉曲終低語愈含情自訴芳心猶未展  
包藏惟恐洩真香尋常嬌怯羞鶯燕為憐坐客俱多才  
拚羞試許求相見安然若有惜花情願丐錦章鐫琬琰  
溫柔淑惠已無雙更聽斯言真絕艷放懷舉白不暫停

酷嫌鸚鵡杯中淺醉玉顏山卧綺窗秋水一牀凝角簾  
悠揚好夢入巫峯洩洩溶溶睡正濃遽然驚覺一何有  
點綴餘霞散眼封依約餘香雖滿袂行雲縹緲已無蹤  
壺中天地古來有默想風物遙應同我聞劉阮曾迷路  
武陵邂逅如花女靈丹咀嚼頓輕身脫躡紅塵已仙去  
又聞仙去有蕭防曾耦雙成飲玉漿一朝誤入華陽洞  
于飛終許學鸞凰仙凡異境無憑據每笑前聞但虛語  
豈意親逢事偶符始信人間有奇遇歸來燈火欲黃昏

隱几無聊暗追慕  
濡毫試作夢仙謠  
端欲夢魂重默悟  
鄧肅

古意

妾身如暮雲陰霾  
愁漸濃郎來如曉  
色日高雲自空曉  
色未應夜愁雲不  
可重會持一杯酒  
舉室生春風  
妾心如寒梅隨郎  
過江東妾身如飛  
雪知落何亭中雪  
花故清絕何人能  
擊節梅花歲歲春  
千秋香不滅  
妾如傍籬菊不肯  
嫁春風郎如出谷  
鶯飛鳴醉亂紅亂

紅有何好風雨一夕空  
菊英雖枯淡不隨霜露濃

汪藻

古鏡行

我有辟邪鏡得之咸陽宮  
其陰為天池一母將九龍  
旁書負圖字土蝕如旋蟲  
絨以駭雞珍妙極捶之工  
請言照遠近十里秋毫空  
豈不鑒脂澤所貴肝膽通  
問誰為此器太古非人功  
客聞重歎息意欲窺靈蹤  
高堂不辭倚恐客難稱  
容繩窮匣半起四室來悲風  
日車當晝留

羞澀如頑銅森然髮上指凜若臨霜鋒我還撫客手此  
豈世寶同揮淚兩無言掩鏡顰囊中

李彌遜

行路難

江山碯石蒼虬立山激江流浪頭急風昏月暗魚龍愁  
電掣雲奔鬼神入船頭星斗天為低夜潮生寒洲渚移  
鳴舷鼓柁驚楚子危檣遠纜號吳兒篙師咄咄自相語  
明發扁舟繫何許半月行江十日風寸步家山隔秦楚



黃衫年少金雕鞍日高華屋春夢殘  
揮花走馬咸陽道  
世上空嗟行路難

漁父詞六首

一葉扁舟漾廣津無心鷗鳥遠  
親人蘋蓼岸靜投綸危  
坐初無一點塵

釣艇夷猶一葦橫烟波萬頃寄餘生  
春雨歇暮霞明零  
亂溪花墮玉英

撇棹歸來起暮涼樂哉誰復慕軒裳  
橫短笛罷鳴榔紅

藕花繁作陣香

木落漁村載酒過綠波萍藻鰕魚多  
拚醉飲儘顏酡不負平生笠與蓑

玉樹瓊田瑩骨清短蓬飄灑動吟情  
魚換酒樂昇平間道君王日聖明

卧月眠風樂有餘蒹葭深處釣重湖  
斟魯酒鱸魚一片家風入畫圖

周紫芝

莫愁歌

蓮花深紅蓮葉綠平沙月上鴛鴦宿青腰三板蘭作橈  
月下莫愁歌一曲移船入花花轉深花深調苦難為音  
江邊夜半誰為語只有嬋娟知此心露華漸白月漸午  
刺舟自覓來時路明朝繫纜柳邊門却在夜來潮落處

秋閨詞

西風動簾幕蟋蟀鳴高堂蔓草濕零露秋閨知夜長佳  
人掩朱戶背燭解羅裳願言鴛鴦夢雙飛入方塘清影

橫疎櫺奈此明月光  
依依照長夜炯炯明  
愁腸不恨郎不歸  
恨月入我牀披衣復  
起坐頻翠挑殘缸開  
絨取素書解結羅帶  
傍一讀再三歎再讀  
淚數行終夜不成寢  
曙色忽滿窻雖云有  
膏沐誰能理晨粧

霽月謠

和羅仲共  
效李長吉

江鼉吹浪江水急  
雷師鞭鼓旌旗濕  
黑雲駕雨霹靂鳴  
怒龍拏空半天立  
須臾陰雲空四垂  
廣寒殿冷風披披  
玉觴燕罷王母歸  
紅鸞簇扇香霧飛

木芙蓉歌

吳江十月霜華淺，秋空無雲霜日暖。  
芭蕉樹暗簾幕垂，木芙蓉開紅婉婉。  
銀牀露重梧葉飛，金錢埽地秋蘭萎。  
無人自對秋風笑，黃蜀葵花不同調。  
慢綠妖紅解醉人，徐娘未老秋娘少。  
少年時節歡樂多，紅蓮影落秋江波。  
若邪女兒白如玉，夜半採蓮聞棹歌。  
驚風吹浪鴛鴦起，回頭日月飛梭裏。  
對花不飲今蹉跎，淚濕秋風當奈何。

王庭珪

仙人春宴曲

高樓玉佩搖春風銀槽壓雨珍珠紅  
天留曉月十分魄飛光下照仙人宮  
瑤姬半醉撾鼉鼓綵鳳吹笙黃鶴舞  
雙成翠袖織藕絲麻姑行厨擘麟脯  
金盤燒蠟夜未央從妃進果蟠桃香  
坐上花開人未老他日重來花更好  
三千年後忽相逢再約羣仙醉蓬島

呂本中

怨歌行

借君手中板為君歌一辭辭中宛轉君不曉為君說盡  
長相思輕霜夜度吳城暖楓葉蘆花秋意晚萬里春隨  
驛使歸十年夢逐佳人遠當時笑語似兒劇象牀玉手  
無消息古岸風江千里船咫尺春愁那得憐君不見信  
陵門下客侯嬴不用今頭白

倣古樂府二首

君住長江邊妾上長江去長江日夜流相思不相顧  
長江日夜流妾心終不改誰謂江頭人相思不相待

擬古樂府

高堂陳八音同聽不同樂  
狂飈送鴻鵠萬里翔寥廓  
一去三十年事事非前約  
當時綠綺琴塵埃無處著  
時節非不久此意但如昨

別離行

城頭草木日夜黃  
九月北風天雨霜  
月色入戶侵我牀  
美人乃在天一方  
舊遊可樂不可忘  
恨君不隨雁南翔  
恨妾塊守此空房  
曉風忽來吹夢長  
夢中與君還故鄉



黃金為屋玉為堂與君更笑億千場不須合佩雙鴛鴦  
秋夜行

八月九月啼寒螿十月北風天雨霜客遊無聊思故鄉  
書來不來空斷腸鴻飛何為滿夕陽舉頭攬取明月光  
置我堂上方尺牀滿酌玉杯碧琳琅喚取姮娥來共嘗  
人間歡樂壽命長不須辛苦老桂傍

田家樂

東家西家蠶上簇南村北村麥向熟小兒腰鎌日早歸

大兒去就田間宿斗酒相邀不為薄  
隣翁相對且斟酌  
聖主當陽億萬年年歲歲田家樂

陳與義

古別離

東門柳年年歲歲征人手千人萬人於此別  
柳亦能堪  
幾人折願君速歸與君期要及此柳未衰時

曹勛

補樂府十篇 并序

夫小雅廢而頌聲寢王澤竭而詩不作何則治亂之迹殊而哀樂之情變也故簫韶歌虞鳥獸率舞靡靡歌夏滛洎流化是知吟詠性情關乎盛衰叅諸天地俯仰疾徐接於影响形於風化傳以為動天地感鬼神不亦信哉予讀古史見六代之樂及覽外傳自宓義以至於商皆有其名而亡其辭唐元結嘗第而補之惜其文勝理異予志於古而不及見者也因申其名義補而發之庶幾一唱三歎

當有賞音者存焉云耳

帝宓犧氏之樂歌

網罟以利民也

網兮罟兮惟田漁時兮食兮民之須以享以祀兮燔祭有餘

帝神農氏之樂歌

豐年報帝功也

豐年告成百穀用登匏籩既盈黍稷既馨昭假是膺

帝有熊氏之樂歌

雲門紀瑞應而昭靈命也

於昭上帝靈命有赫其命維何卿雲五色翩如游龍萃

如山崇來臨來止惕然有顙惟欽惟畏迺祗迺庸肇建  
官師神民肅雍

帝少昊氏之樂歌

九淵澤及  
飛沈也

鳥飛於天魚躍於淵俟其尸之其然而然物之生矣時  
其殖矣職其宜矣安其居矣神之降依昭格左右霜露  
所需罔不在宥

帝高陽氏之樂歌

五莖萬物遂其性  
而遍諸嘉生也

悠悠上天罔不覆護兮芸芸動植靡不康阜兮三光全

兮五穀熟兮神顧歆兮吾人昌兮微上帝之功兮疇依

帝高辛氏之樂歌

六英草木暢茂而被其光華也

時雨濛濛自西及東日月所至罔不率從田有黍稷原有榛栗尊卑秩秩民有家室惟天沖沖惟天崇崇允執厥中臻於大同

帝陶唐氏之樂歌

咸池德施周普而流於罔極也

鴻惟烈祖啟迪後人皇皇上帝俾予字民民協平康帝命式臧宅彼陶唐光於萬方萬方億寧亦莫我敢承如

天之運如日之升孰知其極兮不可得而名不可得而稱

帝有虞氏之樂歌

大韶能紹帝堯之德而同於無為也

草木繁穠兮陰雨膏之百穀豐衍兮寒暑成之萬物護理兮元凱馴之顧否德之弗類兮敢不允恭以承之庶揖讓以救爭兮傳諸罔極世不乏聖兮維皇與直俾帝堯之至公兮終惟斗之不忒

夏后氏之樂歌

大夏美其功利之大而民歌樂之也

於皇上聖臨御有赫洪流湯湯弗降弗辟命於帝庭纘  
服是膺隨山濬川海隅攸寧五服既宅貢有常職恩覃  
遐荒惟帝之力元圭告功敢不承式地平天成垂休罔  
極

有商氏之樂歌

大護美其寧亂救  
民而能覆護之也

維天有光式彼大商俾正以爾萬方萬方其乂易亂為  
治至於上下鳥獸草木罔不安遂帝命是膺聖政日新  
佑我烈祖以克相爾後人



琴操十首

并序

錄三首

唐韓愈依古述琴操十篇詞存而義不復槩見又  
聲譜僅可傳其彷彿而莫知其由是故悲思怨刺  
抑揚折衷皆不知其旨夫所謂操者言其志節之  
不可以變而衆人之莫我知而一歸於時命將感  
激以自傷寄之於聲音者也大抵皆聖賢憤懣之  
所為作也今依韓愈先後之次復述十首各冠其  
事於首篇云爾

猗蘭操

孔子傷不遇時作

猗嗟蘭兮其葉萋萋兮猗嗟蘭兮其香披披兮胡為生  
茲幽谷兮不同雲雨之施紛霜雪之委集兮其茂茂而  
自持猗嗟蘭兮

雉朝飛操

牧犢子行年七十無妻見雉雙飛感之而作

雉兮朝飛鳴聲相隨朝刷其羽兮夕哺其兒雖有風雨  
兮莫或化離嗟余之人兮曾莫汝為

別鶴操

商陵穆子取妻五年無子父母欲其改娶其妻聞之中夜悲嘯穆子感之

而作

明月皎皎兮霜風淒淒摧雲翼兮天之涯望昆丘之路  
兮不可以同歸子其棄予兮予將疇依月皎皎兮風淒  
淒

隴頭吟

并序

古樂府有名無詞因補之

烏落黃雲塞草秋隴頭之水東西流水聲嗚咽嗚啾啾  
馬聞思舊樵人聞思舊丘年年征戰無時休誰能到此

求封侯

白頭吟

并序

昔百里奚去虞傭賃自給秦以五羊之皮贖歸任  
以國政後悅秦女而疎其妻司馬相如遊宦不遂  
文君奔之後因其資得極意於文詞及貴悅茂陵  
女子文君見棄作白頭吟以傷之

相如素貧賤羽翼依文君一朝富貴擅名價文君見棄  
如束薪五穀自傭賃釋褐歸強秦鳴鐘列華屋膳羞羅

八珍厭此糟糠妻悅彼新美人二子既失意瑤瑟流埃  
塵促軫不成曲未唱先眉顰一發動三歎淚下沾羅巾  
通宵坐披衣夙昔誰與陳愁歎不復道平明白頭新

梁父吟

并序

昔人有壯歲從軍老而還家窮獨無依晨行泰山  
下因疾哀歌以自傷後人感之陸機沈約皆有此  
作叙時運流邁君子履信思順悲感之意因申而  
廣之為變體云

晨行泰山下興懷念梁父欲往失所從荒塗亘今古却  
立空踟躕憂來誰與語日暮遵歸塗冥冥暗風雨錯莫  
傷懷抱僅得依門戶幡然賡長謡培塿隘齊魯何當執  
策從鑾旗翊贊登封繼三五

夜坐吟

空堦夜滴秋宵雨雨入芭蕉動窻戶佳人愁寂坐幽閨  
良人萬里勤征戍勤征戍在何處五載乘邊守當路漢  
家新築受降城戍卒還家免租賦歸來且莫歎白頭濁

酒狂歌醉朝暮

長夜吟并序

昔魏公子信陵君招賢下士救垂亡之趙挫狼虎  
之秦連諸侯之師西向以報秦人固守鼠伏而不  
敢出安釐王畏公子之賢遂罷公子兵公子恐近  
禍因與賓客為長夜之飲余悲公子之志作長夜  
吟以申之

智士名不足愚夫樂有餘況復冬夜長風雪迷通衢美

人邀我飲清酒開玉壺明眸艷紅燭流盼光四隅紫風  
轉修袂逸響緣綺疏龍香滿珠閣蘭氣生羅襦遺簪復  
墮珥笑語相迎扶回頭問公子不醉將何如

長吟續短吟

桐花葉密春風老長門路暗迷芳草螢燭流輝露濕光  
蟾蜍景落莎雞曉金烏出谷上蟠桃別院笙簫歌未了  
九華烟滿醉楊妃樊姬靜聽雞聲悄舊人且莫妬新人  
別有蛾眉更妍巧



三峽流泉歌

并序

古詞皆云琴集云初阮咸所作今新而補之

草木搖落兮露為霜  
三峽之水兮流湯湯  
我欲絕之兮恨無梁  
邈佳人兮天一方  
明月皎皎兮泉流湯湯

櫂歌

并序

李白文集有金陵翫月醉著紫綺裘烏紗巾與酒客數人櫂歌秦淮往石頭訪崔四侍御因作櫂歌行以紀之

謫仙醉揖金陵月，浩歌目送飛鴻絕。  
江城樽俎照清輝，樓臺忽作烟霞宅。  
長杯引竭北斗空，吳歛楚舞無顏色。  
行行倒著紫綺裘，徑上蘭舟岸紗幘。  
笑談欬唾驚魚龍，歷塊羣山看滅没。  
石頭水底度冰輪，迢迢輾破澄空碧。  
左回右盼生英風，聯袂招邀盡狂客。  
相將醉卧綠羅烟，三山不動鰲無力。  
秦淮寂寂江月空，人物風流難再得。

三婦艷歌

大婦雙綺襦，中婦紅羅裾。  
小婦服翡翠，理曲調笙竽。  
良

人幸安坐美酒傾玉壺

大婦織雲錦中婦繡鴛鴦  
小婦獨無事對鏡理紅粧  
良人幸安坐帳暖自添香

日出引

雲冥冥風淒淒綺疏未白雞已啼  
角聲纔斷闕朱扉闢  
朱扉款朝日君王劔佩朝諸侯  
赫赫明明光萬國

思歸引

歲崢嶸以高逝兮辰一往而不返  
夫君胡為乎伏幽陵

而連蹇邈佳人之懷余兮策余馬之不前亘川塗之修阻以紛錯兮積雪漫漫而閉天期百舍之不息兮命予駕而勉旃

結客少年場行

結客少年場驂騑從驕驍鬪雞橫大道獵騎卷平岡婚姻聯衛霍賓客紛金張報仇通姓氏排難匿行藏功名看寶劔富貴珥貂璫逸氣凌秋鶚清才負錦囊訴諧驚四座議論駭諸郎日暮平康裡花陰醉滿牀

聖人出

并序

古樂府有題無詞今補之

升太微法璇璣闕紫宮清九圍甄符命以膺歷廓氛祲  
而建靈旗混同書之文軌兮納民物於雍熙噫嘻惟仁  
惟義則吾知其能所以保持

上雲樂

真王嚴仗衛清道表前旌翠輦浮龍藻霜戈麗虎兵哀  
笳鳴廣路警蹕過曾城後乘超王屋前除上玉京諸天

觀鼓節列聖肅儀形朝謁虛皇罷麾幢下穹青蒐兵寧  
紫戶閱籍按黃庭十洲皆承事九宇仰裁成暇豫迎春  
宴還宮召百靈綠室陳歌舞陽臺煥日星玉酒浮樽滿  
天花覆坐馨宮謠洞真唱遐覽悲劫齡俯盼紅塵子起  
滅輕浮萍

龍笛曲

美人滿酌金屈卮勸我行樂當及時艷歌流舞揚光輝  
揚光輝照春日壽萬春歡未畢

春江行

浦嶼連芳草天桃間柳堤征鴻下天際游女過前溪魚  
沒驚帆影林疎聞鳥啼王孫聯繡騎童子解香觴吳姬  
笑留飲同指畫橋西

艷歌行

陽春麗華旦杲日延清暉庭前天桃花灼灼流芳菲佳  
人惜良辰游子行不歸君看天桃花芳菲能幾時

步月謠

太清天宇清且高  
皎然冰鑑懸層霄  
絳河水淺閭風息  
蟾光度影搖金鰲  
仙人縱駕游八極  
鳳簫歌吹鳴嘈嘈  
星宮月殿風馬遠  
珠華露濕旌旄展  
還虛按轡窺塵寰  
波裏三山銀浪卷

游仙謠

羽蓋承流景  
飈輪汎紫霞  
前旌絳霄隊  
駐節王母家  
真童發清謠  
雲表翔哀笳  
樓臺上清漢  
服綵明珠華  
萬春若朝菌  
歡樂庸可涯  
瑤席未終醺  
零落蟠桃花



美女篇

芙蓉開綠水青松映海棠新晴沐膏雨艷色明朝陽綽  
約彼妹子轉盼流輝光被服妖且妍細挹薔薇香下有  
合歡帶繡作雙鴛鴦上有雙同心結作明月璫珠環垂  
兩耳翠鳳翹釵梁瓊鈎約雙袖提籠學採桑採桑城南  
隅五馬停路傍調笑不一顧但見桑條長歸來候蠶眠  
靜坐調笙簧結髮事夫壻誰羨東家王

蕭史曲

玉簫散奇響真氣淒金石招攜偶冥會理愜心自適富  
貴如朝華況復多得失胡不希長年練氣固形質高舉  
凌仙翰雙飛上層碧揮手謝時人去來空役役

採桑曲

鳴鳩初拂羽桑葉破新萌采采不盈掬攀多力未生春  
服挹朝露曉日暎粧明語學流鶯巧身同飛燕輕使君  
勞借問夫壻自專城

江臯曲

漪漣帶修渚遠水明朝暉青山橫倒景畫鷁掩斜扉游  
女逢交甫陳思值洛妃菱歌隨棹遠鷗鳥背人飛別有  
嘉游處芳樽照舞衣

泛水曲

春服僅能試荷小未成蓮畫舫維青幄平波幕素烟暖  
日薰花氣新萍點翠鈿歌吹浮天上旌旗轉座前促粧  
留晚景續酒載歸船前驅戒津吏除道候江壩

楊花曲

千里萬里長安道送君思君為君老願為水底石菖蒲  
不教零落同百草

採菱曲

修渚通阿閣蘭舟飾翠旗吳姬年十五乘舟泛綠池菱  
花羞寶靨皓腕發斜暉行歌棹船去不覺白鷗飛

夜夜曲

舞衣疊翡翠海月挂珊瑚香滿流蘓幄相迎問醉無

春江花月詞

羣芳珠箔映春樓樓上珠簾捲玉鈎十二香衢遍羅綺  
青樓和月為君愁

春閨怨

著意繡鴛鴦雙雙戲小塘繡罷無心看楊花滿繡牀

秋閨怨

憂勤翻作妬險詖自為才趙瑟絃初絕秦箏曲更哀蛛  
網羅妝鑑庭蕪暗玉階聽雞雖自悞辭輦却成非猶謝  
朝陽月時來照寢衣

幽閨怨

妾年十五從良人  
良人待旦驅從軍  
至今遠戍幽山北  
但見深閨秋草綠  
年年塞雁去還來  
深院無人空綠苔  
自君之出矣二首

自君之出矣  
龍香消寶衣  
思君共明月  
千里奉光輝  
自君之出矣  
粧臺生網絲  
思君拂團扇  
相與共提携  
邯鄲才人嫁為廝養卒婦

落葉逐驚風  
落花逐流水  
漂零無定端  
寄托隨所委  
朝

榮瑤園中暮落窮轍裏豈不惡糟糠豈不願羅綺羅綺  
閉深宮嫉妬交相靡糟糠守窮廬苦樂同終始行藏宜  
自然燕巢茅屋底

遠如期

約指金環瘦不持羅衣寬盡減腰圍紅芳坐消歇王孫  
歸不歸

獨不見

獨不見誰相憶花影上珠簾明月穿窻隙翡翠暗無光

蒼苔點行跡驚鑑挂珊瑚寶靨銷金碧彷彿聞簫韶夢  
想見顏色為我報新人好好承恩澤君看後庭花芳菲  
能幾日

王孫遊二首

紅芳開繡戶碧草襯斜陽樓上頻回首思君道路長  
天桃與芳草艷色明朝陽思君念華旦賤妾惜容光

望行人

西北有高樓窳窳入空碧徙倚遍闌干楊花滿行迹不



見行人歸但見楊花白披襟向春風為我傳消息春風  
不見知此意無人識

巫山高

巫山高望不極飛鴻欲度愁無力我欲絕之乏羽翼峽  
江水急荆門遠魚龍遊之不能轉下無舟楫上無梁我  
欲濟之憂力尠

高樓月

高樓月倒景入闌干人眠綺窻影月在青雲端相攀不

可得空成簾幕寒

楊花曲

春光誰占得楊花獨自知  
未到傳消息將歸送別離  
隨風飛更急入戶舞還低  
大有撩人處粧臺惱畫眉

胡宏

桃源行

北歸已過沅湘渡騎馬東風武陵路  
山花無限不關心  
惟望桃花古來樹聞說桃花更有源  
居人共得仙家趣

之子漁舟安在哉我欲乘之望源去川原遠近蒸霞開  
一片隨水從東來及晨遍覽三春色莫使風雨空莓苔

朱松

吳江曲

吳江女兒白如玉花底紗窻傍谿綠玉簫春暖貼朱脣  
故作陽春斷腸曲扁舟掠水去如飛不見嫣然一笑時  
回首江城只孤塔向來一念傷因誰

劉子翬

清江行

漁翁一棹老清波  
稚子學語能漁歌  
日暮沙頭寒蕪竹  
雨餘船角亂堆蓑  
鶯殘小鮮仍自鱸  
湖海茫茫醉鄉內  
夜闌酒渴漱寒流  
月照蘆花上篷背

御選宋詩卷六

謹案卷五第八頁前六行中有一人鼓羯鼓按沈  
遼雲巢集上鼓字作奏與此異

卷六第三頁後三行未擬賞心催破萼刊本催訛  
摧今改



金  
石  
文  
庫  
藏  
書



總校官庶吉士臣侍朝

校對官檢討臣蕭九成

謄錄舉人臣李駟



欽定四庫全書薈要

集部

御選宋詩卷

七八

詳校官原任主事<sub>臣</sub>李斯咏



欽定四庫全書薈要卷一萬八千三百十四

集部

御選宋詩卷七

樂府歌行四

王銍

折楊柳

手搗楊柳贈行人  
情條恨葉江南春  
朦朧疎烟濕芳草  
搖蕩微風生白蘋  
長亭短亭銷離魂  
古情不盡今情新  
一聲驪歌幾聲哭  
行人去後春江綠  
歌哭相雜江頭



相看不發情何屬江河到海有窮日輪蹄行路無已時  
路傍楊柳折已盡東風再換明年枝

妾薄命

并序

夜讀齊梁諸集見多有此作因賦二篇繼其聲  
寒閨有靜女十載念遠征命擬絳綃薄身同朝露輕  
存心合歡綺待得機杼成從來君獨賞詎可賣都城憑  
夢欲寄遠舊路春草生獨夜理瑤琴淚燭剪不明待誰  
相應節要自不勝情會有不眠者聽此斷腸聲

少年輕遠行易發同爾汝紅顏望中老離恨尚如許妾  
身異金石更涉幾寒暑長天誰云廣不見收墮雨愁來  
津頭望信絕不得渡鄰婦念幽獨艇子隔溪語落日下  
空江修烟淡晴渚流恨滿春風西飛數歸羽

古意

茅簷秘秀色從古歎不遭遊子去未返徒使寸心勞朝  
歎江海深夜視星斗高歸期約春風今已木葉凋一日  
兩回來看取門前潮

漁父詞

風波穩處釣舟閒  
雲去諸山暝不還  
江面一峯何所似  
青銅鏡裏綠雲鬟

風裊溪頭釣線多  
戲魚無奈巧依荷  
直須飄淨浮萍草  
盡放青天照碧波

范浚

送春曲

春光勸汝一杯酒  
我能為春作高歌  
未解春能聽歌否

春歸有底急落盡桃花紅園溪漠漠野陰靜兔葵燕麥  
空搖風風光幾何時背我忽如客殘絲欲斷感春心語  
燕勞勞上簾額我有惜芳意一春憐物華春來雪裡索  
梅笑春去悵望飛楊花春歸知復來奈此經年別綠楊  
三月暮天愁鷓鴣一聲芳草歇歌竟我亦醉一棹觥船  
空明年待春花樹下放歌擎酒相迎逢

周必大

皇太子受冊樂章一首

皇太子出門明安

淵中象德玉裕凝姿進退周旋有肅其儀既安國本益  
隆慶基燕及兩宮福祿如茨

德壽宮加上尊號冊寶樂章一首

升殿聖安

天畀遐福允彰父慈維昔曠典我能舉之徐爾陟降敬  
爾威儀申錫無疆永言保之

中宮冊寶樂章六首

皇帝升座乾安

赫赫惟皇如日之光肅肅惟后如月之常禮行一時明  
照無疆天子涖止疇敢不莊

皇后出閤坤安

椒塗蘭馭河潤山容副笄在首褱衣被躬靜女其姝實  
翼實從自彼西閤聿來殿中

皇后受冊寶成安

備物典冊樂之鼓鐘拜而受之極其肅雖司言司寶各



以職從行地有慶與天無窮

命婦入門咸安

碩人其碩公侯之妻翟第以朝象服是宜如星之共  
月之輝母儀既瞻羣心則夷

皇后降座徽安

窈窕淑女備六服兮陟降多儀聳羣目兮內治允修  
陰教肅兮宜君宜王綏百福兮

皇后歸閣泰安

天監有周是生太任亦有太姒嗣其徽音孰如兩宮慈  
愛相承思齊之盛復見於今

漁父四時歌

春

三湘七澤雲連水短棹意行無遠通江花時傍綠蓑飛  
水鳥忽隨清唱起醉從歡呼踏浪兒鮪可鱸分杭可炊  
芳草從教天樣遠都無閒恨寄萋迷碧桃幾片來何處  
試訪秦人武陵路

夏

朝霞沈綺鳥鵲驚釣車徐理棖一鳴夕蟾散金鷗鷺浴  
乘流蕩槳清江曲行人亭午汗如流綠陰濃處找扁舟  
絲綸卷盡身無事日長睡足風颼颼覺來一觴仍起舞  
未信人間有炎暑

秋

世人只詠江如練此景何曾眼中見露零月白人已眠  
萬頃風光儂自占蓴鱸況復生計優酒醒還醉餘何求

有時閒看飛鴻字斜倚高竿不掉頭曉來誰誤招招渡  
一笑黃緣葦間去

冬

白浪粘天雲覆地津人斷渡征人喟欲矜好手傲風波  
故把扁舟恣遊戲雪蓑不博狐白裘尺寸之膚煖即休  
賣魚得錢沽美酒翁媪兒孫交勸酬田家禾熟疲輸送  
樂哉蓬底華胥夢

范成大

春思

沙際綠蘋滿樓頭芳樹多光風入網戶羅幕生繡波前  
年花開憶湘水今年花開淚如洗園樹傷心三見花依  
舊銀屏夢千里

車遥遥篇

車遥遥馬憧憧君遊東山東復東安得奮飛逐西風願  
我如星君如月夜夜流光相皎潔月暫晦星常明留明  
待月復三五共盈盈

夜宴曲 效李賀

金麟噴香烟龍蟠玉燈九枝青闌杆明瓊光帶湘簾斑  
風幃繡浪千飛鸞舞娥紫袖如弓彎雲中一笑天解顏  
嘶盃快卷玻璃瓊乾花樓促箭春宵寒二十五聲宮點闌

樂神曲

以下共四  
首效王建

豚蹄滿盤酒滿盃清風蕭蕭神欲來願神好來復好去  
男兒拜迎女兒舞老翁翻香笈且言今年田家勝去年  
去年解衣折租價今年有衣著祭社

繰絲行

小麥青青大麥黃  
原頭日出天色涼  
姑婦相呼有忙事  
舍後煮繭門前香  
繰車嘈嘈似風雨  
繭厚絲長無斷縷  
今年那暇織絹著  
明日西門賣絲去

田家留客行

行人莫笑田家小  
門戶雖低堪灑埽  
大兒繫驢桑樹邊  
小兒拂席軟勝氈  
木臼新春雪花白  
急炊香飯來看客  
好人入門百事宜  
今年不憂蠶麥遲

催租行

輸租得鈔官更催踉蹌里正敲門來手持文書雜嗔喜  
我亦來營醉歸耳牀頭慳囊大如拳撲破正有三百錢  
不堪與君成一醉聊復償君草鞋費

三湘怨

牙檣罨畫櫓搖漾三湘浦佳人翔綠裾含顰為誰舞  
拳新荷葉愁絕烟水暮風雲忽飄蕩隱約聞簫鼓

刈麥行



菊花開時我種麥桃李花飛麥叢碧多病經旬不出門  
東陂已作黃雲色腰鑣刈熟趁晴歸明朝雨來麥帶泥  
犁田待雨插晚稻朝出移秧夜食麩

高樓曲

連下一首俱  
夢境所得

歲暮天涯客黃昏蝙蝠飛高樓人不到小雨怯單衣

湘江怨

蘋芷迷烟路蓮舟忘却歸夜寒江水黑風雨夢如飛

竹枝歌二首

歸州  
作

東鄰男兒得湘纍西舍女兒生漢妃  
城郭如村莫相笑人家閨閨似渠稀

東岸艤船拋石門西山炊烟連白雲  
竹籬茅舍作晚市青蓋黃旗稱使君

竹枝歌九首

夔州作

五月五日嵐氣開南門競船爭看來  
雲安酒濃麴米賤家家扶得醉人迴

赤甲白鹽碧叢叢半山人家草木風  
榴花滿山紅似火

荔子天涼未肯紅

新城果園連滾西枇杷壓枝杏子肥半青半黃朝出賣  
日午買鹽沽酒歸

癭婦起墟城裏來十五五市南街行人莫笑女麤醜  
兒郎自與買銀釵

白頭老媪蓼紅花黑頭姑娘三髻了背上兒眠上山去  
採桑已閒當採茶

百衲畚山青間紅粟莖成穗豆成叢東屯平田秔米軟

不到貧人飯甌中

白帝廟前無舊城  
荒山野草古今情  
只餘峽口一堆石  
恰似人心未肯平

灩澦如樸瞿塘深  
魚復陣圖江水心  
大昌鹽船出巫峽  
十日潮流無信音

當筵女兒歌竹枝  
一聲三疊客忘歸  
萬里橋邊有船到  
繡羅衣服生光輝

後巫山高一首

余前年入峽常賦巫山高今復作一篇十二峯中東西各一峯

最奇不可繪盡左右前後餘峯之可觀者尚  
多不止十二峯也不問陰晴雲物常相映帶  
尤為勝絕但以漲江湍怒難艤泊鼓棹而過  
不復登廟前余以水暴漲得下瞿唐至巫山  
縣人云却須水退始可入巫峽  
一夜水落十餘丈遂不復滯留

凝真宮前十二峯兩峯娟妙翠插空餘峯競秀尚多有  
白壁蒼崖無數重秋江漱石半山腹倚天捎鐵荒行蹤  
造化鍾奇蟲瑤巘真靈擇勝探珠宮朝雲未罷暮雲起  
陰晴竟日長冥濛瑤姬作意送歸客一夜收潦仍回風  
仰看館御飛檝過回首已在虛無中惟餘烏鵲作使者

迎船送船西復東

臘月村田樂府十首

并序

余歸石湖往來田家得歲暮十事採其語各賦一  
詩以識風土號村田樂府其一冬舂行臘日舂米  
為一歲計多聚杵臼盡臘中畢事藏之土瓦倉中  
經年不壞謂之冬舂米其二燈市行風俗尤競上  
元一月前已買燈謂之燈市價貴者數人聚博勝  
則得之喧盛不減燈市其三祭竈詞臘月二十四

夜祀竈其說謂竈神翌日朝天白一歲事故前期  
禱之其四口數粥行二十五日煮赤豆作糜暮夜  
闔家同饗云能辟瘟氣雖遠出未歸者亦留貯口  
分至襁褓小兒及童僕皆預故名口數粥豆粥本  
正月望日祭門故事流傳為此其五爆竹行此他  
郡所同而吳中特甚惡鬼蓋畏其聲古以歲朝而  
吳以二十五夜其六燒火盆行爆竹之夕人家各  
又于門首然薪滿盆無貧富皆爾謂之相煖熱其

七照田蠶詞與燒火盆同日邛落則以禿帚若麻  
蘸竹枝輩然火炬縛長竿之杪以照田爛然遍野  
以祈絲穀其八分歲詞除夜祭其先竣事長幼聚  
飲祝頌而散謂之分歲其九賣癡歌詞分歲罷小  
兒繞街呼叫云賣汝癡賣汝歌世傳吳人多歌故  
兒輩諱之欲賈其餘益可笑其十打灰堆詞除夜  
將曉雞且鳴婢獲持杖擊糞壤致詞以祈利市謂  
之打灰堆此本彭蠡清洪君廟中如願故事惟吳



下至今不廢云

冬春行

臘中儲蓄百事利第一先春年計米羣呼步碓滿門庭  
運杵成風雷動地篩勻箕健無糶糠百斛只費三日忙  
齊頭圓潔箭子長隔籬耀日雪生光土倉瓦龕分蓋藏不  
蠹不腐常新香去年薄收飯不足今年頓頓炊白玉春  
耕有種夏有糧接到明年秋刈熟鄰叟來觀還歎嗟  
貧人一飽不可賒官租私債紛如麻有米冬春能幾家

燈市行

吳臺今古繁華地偏愛元宵燈影戲春前臘後天好晴  
已向街頭作燈市疊玉千絲似鬼工剪羅萬眼人力窮  
兩品爭新最先出不待三五迎東風兒郎種麥荷鋤倦  
偷閒也向城中看酒壚博簺雜歌呼夜夜長如正月半  
災傷不及什之三歲寒民氣如春酣儂家亦幸荒田少  
始覺城中燈市好

祭竈詞

古傳臘月二十四竈君朝天欲言事雲車風馬小留連  
家有盃盤豐典祀猪頭爛熟雙魚鮮豆沙甘鬆粉餌圓  
男兒酌獻女兒避酹酒燒錢竈君喜婢子鬪爭君莫聞  
猶犬觸穢君莫嗔送君醉飽登天門杓長杓短勿復云  
乞取利市歸來分

口數粥行

家家臘月二十五浙米如珠和豆煮大杓轆轤分口數  
疫鬼聞香走無處鏤薑屑桂澆蔗糖滑甘無比勝黃梁

全家團圓罷晚飯在遠行人亦留分祿中孩子強教嘗  
餘波徧沾獲與臧新元叶氣調玉燭天行已過來萬福  
物無疵癘年穀熟長向臘殘分豆粥

爆竹行

歲朝爆竹傳自昔吳儂政用前五日食殘豆粥埽罷塵  
截筒五尺煨以薪節間汗流火力透健僕取將仍疾走  
兒童却立避其鋒當堦擊地雷霆吼一聲兩聲百鬼驚  
三聲四聲鬼巢傾十聲百聲神道寧八方上下皆和平

却拾焦頭疊牀底猶有餘威可驅癘屏除藥裏添酒杯  
晝日嬉遊夜濃睡

燒火盆行

春前五日初更後排門然火如晴晝大家薪乾勝豆蔻  
小家帶葉燒生柴青烟滿城天半白棲鳥驚飛啼格磔  
兒孫圍坐犬雞忙鄰曲歡笑遙相望黃宮氣應纔兩月  
歲陰猶驕風栗烈將迎陽令作好春政要火盆生煖熱

照田蠶行

鄉村臘月二十五長竿然炬照南畝近似雲開森列星  
遠如風起飄流螢今春雨電繭絲少秋日雷鳴稻堆小  
儂家今夜火最明的知明歲田蠶好夜闌風燭西復東  
此占最吉餘難同不惟桑賤穀芃芃仍更苧麻無節菜  
無蟲

分歲詞

質明奉祠古今同吳儂用昏蓋土風禮成廢徹夜未艾  
飲福之餘即分歲地爐火暝蒼术香飮盤果餌如蜂房

就中脆餠專節物四座齒頰鏘冰霜小兒但喜新年至  
頭角長成添意氣老翁把杯心茫然增年翻是減吾年  
荆釵勸酒仍祝願但願尊前且強健君看今歲舊交親  
大有人無此杯分老翁飲罷笑撚鬚明朝重來醉屠蘓  
賣癡獸詞

除夕更闌人不睡厭禳鈍滯迎新歲小兒呼叫走長街  
云有癡獸召人買二物于人誰獨無就中吳儂仍有餘  
巷南巷北賣不得相逢大笑相揶揄櫟翁塊坐重簾下

獨要買添令問價兒云翁買不須錢奉賒癡獸千百年  
打灰堆詞

除夜將闌曉星爛糞埽堆頭打如願杖馱灰起飛撲籬  
不嫌灰浣新節衣老媪當前再三祝只要我家長富足  
輕舟作商重船歸大捋引犢雞哺兒野繭可縑麥兩歧  
短衲換著長衫衣當年婢子挽不住有耳猶能聞我語  
但如吾願不汝呼一任汝歸彭蠡湖

陸游



思歸引

善酒不如穩乘舟善騎不如謹持轡妙于服食不如寡  
欲工于揣摩不如省事在天有命誰得逃在我無求直  
差易散人家風脫糾纏烟蓑雨笠全其天莖絲老盡歸  
不得但坐長饑須俸錢此身不堪阿堵役寧待秋風始  
投檄山林聊復取熊掌仕宦真當棄雞肋錦城小憇不  
淹遲即是輕舫下峽時那用更為麟閣夢從今正有鹿  
門期

丹芝行

劒山峩峩挿穹蒼  
千林萬谷蟠其陽  
大丹九轉古所藏  
靈芝三秀夜吐光  
如火非火森有芒  
朝陽欲升尚煌煌  
何由剷取換肝腸  
往駕素虬朝紫皇

春愁曲

客話成  
都戲作

宓義至今三十餘  
萬歲春愁歲歲常  
相似外大瀛海環  
九州無有一州無  
此愁我願無愁但  
歡樂朱顏綠髮常  
如昨金丹九轉徒  
可聞玉兔千年空  
擣藥蜀姬雙鬟姬

姹嬌醉看恐是海棠妖  
世間無處無愁到底事  
難過萬里橋

塞上曲

三尺鐵如意一枝玉馬鞭  
笑把出門去萬里行無前  
當道何崔巍云是玉門關  
方當置屯守征人何時還  
馬色如雜花鎧光若流水  
肅肅不敢譁遙望但塵起  
日落戍火青烟重塞垣  
紫回首五湖秋西風開  
芡觜

長歌行

人生不作安期生，醉入東海騎長鯨。  
猶當出作李西平，手梟逆賊清舊京。  
金印煌煌未入手，白髮種種來無情。  
成都古寺卧秋晚，落日偏傍僧牕明。  
豈其馬上破賊手，哦詩長作寒螿鳴。  
興來買盡市橋酒，大車磊落堆長鉶。  
哀絲豪竹助劇飲，如鉅野受黃河傾。  
平時一滴不入口，意氣頓使千人驚。  
國讐未報壯士老，匣中寶劍夜有聲。  
何當凱旋宴將士，三更雪壓飛狐城。

白紵歌

并序

古有四時白紵亦有止作一時者丙申五月在成  
都烈暑可畏戲作夏白紵二首

雲母屏薄望如空水晶簾疎不礙風美人獨立何所似  
白玉芙渠秋水中素絹細織冰蠶縷清寒不受人間暑  
晚來浴罷綠窻間自把新詩教鸚鵡

翔鸞矯矯離風塵眼明見此絕代人紗窻弄筆消永日  
臨得黃庭新逼真飛樓縹緲今何夕月與玉人同一色  
下簾不為九霄寒自要玲瓏看團壁

出塞曲

佩刀一刺山為開壯士大呼城為摧三軍甲馬不知數  
但見動地銀山來長戈逐虎祁連北馬前曳來血丹臆  
却回射雁鴨綠江箭飛雁起連雲黑清泉茂草下程時  
野帳牛酒爭淋漓不學京都貴公子唾壺塵尾事兒嬉

長歌行

燕燕尾涎涎橫穿乞巧樓低入吹笙院鴨鴨嘴啞啞朝  
浮杜若洲暮宿蘆花夾嗟爾自適天地間將儔命侶意

甚閒我今獨何為一笑乃爾慳世上悲歡亦偶然何時  
爛醉錦江邊人歸華表三千歲春入瑩篴十四絃

秋風曲

秋風吹雨鳴窻紙壯士不眠推枕起牀頭金盡酒尊空  
捩馬相看淚如洗鴻門灞上百萬師安西北庭九千里  
帳前畫角聲入雲隴上鐵衣光照水橫飛渡遼健如鷗  
談笑不勞投馬箠堂堂羽檄從天下夜半斫營虜可鄙  
拾瑩讀書定何益投筆取封當努力百斤長刀兩石弓

飽將兩耳聽秋風

短歌行

富貴得意如登天自計一跌理不全  
晝食忘味夜費眠  
渠過一日如一年春蠶得衣耕得食  
農功初成各休息  
賣酒壚邊紛鼓笛我過一年如一日  
二者求兼勢安可  
與我周旋寧作我春城桃李豈不妍  
雪澗未妨松磊砢  
人生禍福難遽論廟犧烏得為孤豚  
君不見獵徒父子  
牽黃犬歲歲秋風上蔡門



吳娘曲

鏡奩蠶出千黑蟻釵梁梅小雙青豆吳娘十四未知愁  
羅衣已覺傷春瘦閒尋女伴過西家鬪草歸來日已斜  
睡睫濛濛嬌欲閉隔簾微雨壓楊花

賽神曲

叢祠千載臨江渚拜貺千年那可數須晴得晴雨得雨  
人意所向神輒許嘉禾九穗特上府廟前女巫遞歌舞  
嗚嗚歌謳坎坎鼓香烟成雲神降語大餅如槃牲脂肥

再拜獻神神不違晚來人醉相扶歸蟬聲滿廟鎖斜暉  
行路難

平生結交無十人與君契合懷抱真春遊有時馬忘秣  
夜話不覺雞報晨極知貧賤別離苦明日有懷就誰語  
人無根柢似浮萍未死相逢在何許道邊日斜泣相持  
旗亭取醉不須辭君貴堂厨萬錢食我勸一杯應不得  
東吳女兒曲

東吳女兒語如鶯十三不肯學吹笙鏡奩初喜穉蠶出

窻眼已看雙繭成空庭日暖花自舞簾卷巢乾燕新乳  
阿弟貪書下學遲獨揀詩篇教鸚鵡

芳草曲

蜀山深處逢孤驛缺甃頽垣芳草碧家在江南妻子病  
離鄉半歲無消息長安城門西去路細靄斜陽芳草暮  
尊前一曲渭城歌馬蹄萬里交河戍人生誤計覓封侯  
芳草愁人春復秋只願東行至滄海路窮草斷始無愁

漁歌

晴山滴翠水接藍  
聚首漁舟兩復三  
橫埭北斷橋南側  
起船蓬便作帆

湘湖烟雨長蕁絲  
菰米新炊滑上匙  
雲散後月斜時潮  
落舟橫醉不知

估客樂

長江浩浩蛟龍淵  
浪花正白蹴半天  
軻我大舸望如豆  
駭視未定已至前  
帆席雲垂大堤外  
纜索雷響高城邊  
牛車鞦韆載寶貨  
磊落照市人爭傳  
倡樓呼盧擲百萬

旗亭買酒價十千公卿姓氏不曾問安知孰秉中書權  
儒生辛苦望一飽趑趄光範祈哀憐齒搖髮脫竟莫顧  
詩書滿腹身蕭然自看賦命如紙薄始知估客人間樂

古別離

孤城窮巷秋寂寂美人停梭夜歎息空園露濕荊棘枝  
荒蹊月照狐狸跡憶君去時兒在腹走如黃犢爺未識  
紫姑吉語元無據况憑瓦兆占歸日嫁來不省出門前  
魂夢何因識酒泉粉絲磨鏡不忍照女子盛時無十年

小出塞曲

全師出雁塞百戰運龍韜  
金絡洮州馬珠裝夏國刀  
度沙風破肉攻壘雪平壕  
明日受降處甲齊熊耳高

水邨曲

山邨今年晚禾旱奏下民租蠲大半水邨雨足米狼戾  
也放三分慰民意看榜歸來迭歌舞共喜清平好官府  
老翁猶記軍興時汝輩少年那得知

賽神曲

擊鼓坎坎吹笙鳴鳴綠袍槐簡立老巫紅衫繡裙舞小  
姑烏白燭明蠟不如鯉魚糝美出神厨老巫前致詞小  
姑抱酒壺願神來享常歡娛使我嘉穀收連車牛羊暮  
歸塞門問雞鶩一母生百雛歲歲賜粟年年蠲租蒲鞭  
不施園土空虛束草作官但形模刻木為吏無文書淳  
風復還羲皇初繩亦不結況其餘神歸人散醉相扶夜  
深歌舞官道隅

采蓮曲

采蓮吳妹巧菱倩小舟點破烟波面雙頭折得欲有贈  
重重葉蓋羞人見女伴相邀拾翠羽歸棹如飛那可許  
傾鬟障袖不磨人遙指石帆山下雨

三峽歌

并引

乾道庚寅予始入蜀上下三峽屢矣後二十五年  
歸耕山陰偶讀梁簡文巴東三峽歌感之擬作九  
首實紹熙甲寅十月二日也

錄六首

神女廟前秋月明黃牛峽裏暮猿聲危途性命不容恤



百丈牽船侵夜行

不怕灘如竹節稠  
新灘已過可無憂  
古妝戔戔一尺髻  
木盞銀杯邀客舟

十二巫山見九峯  
船頭彩翠滿秋空  
朝雲暮雨渾虛語  
一夜猿啼明月中

蠻江水碧瘴花紅  
白舫黃旗無便風  
涪萬四時常避水  
棚居高出亂雲中

亂插山花簪子紅  
蠻歌相和滾西東  
忽然四散不知處

踏月捫蘿歸洞中

我遊南賓春暮時蜀船曾繫挂猿枝雲迷江岸屈原塔  
花落空山夏禹祠

路傍曲

冷飢食沙磔短褐蒙霜霧黃葉滿山邨行人跨驢去淒  
涼路傍曲朱門人不知秋街槐葉落正是斷腸時

將進酒

我欲挽住北斗杓常指蒼龍無動搖春風日夜吹草木

只有榮盛無時凋我欲剗斷日行道陽烏當空日杲杲  
非惟四海常不夜亦使人生失衰老如山積麴高崔嵬  
大江釀作葡萄酒醅頽然一醉三千杯借問白髮何從來  
楊萬里

行路難

君不見河陽花今如泥土昔如霞君不見武昌柳春作  
金絲秋作帚人生馬耳射東風柳色桃花却長久秦時  
東陵千戶侯華蟲被體腰蒼璆漢初沛邑刀筆吏折腰

如磬頭搶地蕭相厥初謁邵平中庭百拜百不應邵平  
後來謁蕭相故侯一拜一惆悵萬事反覆何所無二子  
豈是大丈夫窮通流坎皆偶爾搏扶未必賢槍榆華胥  
別是一天地醉鄉何曾有生死儂欲與君歸去來千愁  
萬恨付一杯

義娥謠

中秋夜宿辟邪市詰朝早起曉星已上日欲出而  
月未落光景萬變蓋天下奇觀也作義娥謠以記

之

羲和夢破欲啟行  
紫金畢逋啼一聲  
聲從天上下人世  
千邨萬落雞爭鳴  
素娥西征未歸去  
簸弄銀盤浣風露  
一丸玉彈東飛來  
打落桂枝雪白兔  
誰將紅錦幕半天  
赤光絳氣貫山川  
須臾却駕丹砂轂  
推上寒空碾蒼玉  
詩翁已行十里強  
羲和早起道無雙

竹枝歌

過白  
沙作

窮崖絕嶂入雲天  
烏鵲纔飛半壁間  
遠渚長汀草如積

牛羊須上最高山

田畝渾無尺寸強真成水國更山鄉  
夾江黃去堤堤粟一望青來各各桑

絕憐山崦兩三家不種香秔只種麻  
耕遍沿堤鋤徧嶺都來能得幾生涯

東沿西泝浙江津去去來來暮復晨  
上岸牽檣推稚子隔舩招手認鄉人

昨日下午灘風打頭羨他上水似輕鷗  
朝來上水帆都卸

真箇輕鷗也自愁

絕壁臨江千尺餘上頭一徑過肩輿舟人仰看膽俱破  
為問行人知得無

圩丁詞十解

并引

錄五首

江東水鄉隄河兩岸而田其中謂之圩農家云圩  
者圍也內以圍田外以圍水蓋河高而田反在水  
下沿隄通斗門每門疏港以溉田故有豐年而無  
水患余自溧水縣南一舍所登蒲塘河小舟至鎮

水行十二里備見水之曲折上自池陽下至當塗  
圩河皆通大江而蒲塘河之下十里所有湖曰石  
臼廣八十里河入湖湖入江鄉有圩長歲晏水落  
則集圩丁日具土石捷枝以修圩余因作詞以擬  
劉夢得竹枝柳枝之聲以授圩丁之修圩者歌之  
以相其勞云

上通建德下當塗千里江湖繚一圩本是陽侯水精國  
天公勅賜上農夫



南望雙峯抹綠明一峯起立一峯橫不知圩裏田多少  
直到峯根不見塍

兩岸沿隄有水門萬波隨吐復隨吞君看紅蓼花邊腳  
補去修來無水痕

兒郎辛苦莫呼天一歲修圩一歲眠六七月頭無滴雨  
試登高處望圩田

圩上人牽水上航從頭檢點萬農桑即非使者秋行部  
乃是圩翁曉按莊

朱熹

虞帝廟迎送神樂歌詞

并序

桂林郡虞帝廟迎送神樂歌者新安朱熹之所作也熹既為太守張侯拭紀其新宮之績又作此歌以遺桂人使聲於廟庭侑牲璧焉其詞曰

皇胡為兮山之幽翳長薄兮俯清流渺冀州兮何有眷茲土兮淹留

皇之仁兮如在予我民兮不窮以愛沛皇澤兮橫流觴

威靈兮無外

潔尊兮肥俎九歌兮招舞嗟莫報兮皇之祐皇欲下兮  
儼相羊烈風雷兮暮雨

右迎神三章二章四句一章五句

虞之陽兮灘之澍皇降集兮巫屢舞桂酒湛兮瑤觴皇  
之歸兮何許

龍駕兮天門羽旄兮繽紛俯故宮兮一嘒越宇宙兮無  
隣

無隣兮奈何七政協兮羣生嘉信元功兮不宰猶彷彿  
兮山阿

右送神三章章四句

招隱操

并序

淮南小山作招隱極道山中窮苦之狀以風切遁  
世之士使無遐心其旨深矣其後左太沖陸士衡  
相繼有作雖極清麗顧乃自為隱遁之辭遂與本  
題不合故王康琚作詩以反之雖正左陸之誤而

所述乃老氏之言又非小山本意也十月十六夜  
許進之挾琴過余書堂夜久月明風露淒冷揮絃  
度曲聲甚悲壯既乃更為招隱之操而曰穀城老  
人嘗欲為余依永作辭而未就也余感其言因為  
推本小山遺意戲作一闋又為一闋以反之口授  
進之併請穀城老人及諸名勝相與共賦之以備  
山中異時故事云

南山之幽桂樹之稠枝相樛高拂千崖素秋下臨深谷

之寒流王孫何處攀援久淹留 聞說山中虎豹晝  
聞說山中熊羆夜咆叢蒲深林鹿呦呦獼猴與君居山  
鬼伴君遊君獨胡為自聊歲云暮矣將焉求思君不見我  
心徒離憂

右招隱

南山之中桂樹秋風雲冥濛下有寒棲老翁木食澗飲  
迷春冬此間此樂優游渺何窮 我愛陽林春葩晝紅  
我愛陰崖寒泉夜淙竹柏含烟梢青蔥徐行發清商安

坐撫枯桐不問簞瓢屢空但抱明月甘長終人間雖樂  
此心誰與同

右反招隱

步虛詞二首

扉景廓天津空同無員方丹晨儻七氣朶秀東庭房殮  
吐碧琳華仰喻飛霞漿疎轡絕冥外眇目撫太荒策我  
綠軒輶上際於滄浪神鈞亦寥朗晡靄晨風翔養翮塵  
波裏縱橫非有亡一樂無終永千春詎能當

褰裳八度外竦轡霄上遊  
軒觀隨雲起偃駕東亭丘  
丹雘耀瓊崗三素粲曾幽  
躡影遺塵波偶想即虛柔  
盼目娛真際不喜亦不憂  
宴罷三椿期顛徊翳滄流  
千載何足道太空自然疇

武夷擢歌十首

武夷山上有仙靈  
山下寒流曲曲清  
欲識箇中竒絕處  
擢歌閒聽兩三聲

一曲溪邊上釣船  
幔亭峰影蘸晴川  
虹橋一斷無消息



萬壑千巖鎖翠烟

二曲亭亭玉女峯  
插花臨水為誰容  
道人不復荒臺夢  
興入前山翠幾重

三曲君看架壑船  
不知停擢幾何年  
桑田海水今如許  
泡沫風燈敢自憐

四曲東西兩石巖  
巖花垂露碧氍毹  
金雞叫罷無人見  
月滿空山水滿潭

五曲山高雲氣深  
長時烟雨暗平林  
林間有客無人識

款乃聲中萬古心

六曲蒼屏遶碧灣  
茅茨終日掩柴關  
客來倚櫂巖花落  
猿鳥不驚春意閒

七曲移船上碧灘  
隱屏仙掌更回看  
却憐昨日峯頭雨  
添得飛泉幾道寒

八曲風烟勢欲開  
鼓樓巖下水潏洄  
莫言此處無佳景  
自是遊人不上來

九曲將窮眼豁然  
桑麻雨露見平川  
漁郎更覓桃源路

除是人間別有天

御選宋詩卷七